



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

US Open: Stefanos Tsitsipas tasembuba round-i iogo

Tripura assembly speaker Rehati-i mapa toktsüogo

VOL. XVIII NO. 321 (ADOK 321) DIMAPUR ROGONÜ (FRIDAY) RONGJUI (SEPTEMBER) 03, 2021 ₹ 5.00

Nagaland COVID-19: Taneptsü angur 76, case tasen 47, asür pezü

Kohima, Rongjui/September 02 (TYO): Tanü agi ananübuba Nagaland nung COVID-19 cases tasen dang taneptsü angur timba liasü. Brehostibarnü state nung iba tashidak nungi taneptsü angur nisung 76 liasü aser nisung tasen 47 dak COVID-19 aliba jangjateta Nagaland nung iba tashidak agi meneper nisung 30,204 jungogo.

"Tanü Nagaland nung COVID-19 positive cases 47 jangjateta ya Dimapur nungi 17, Mokokchung nung 10, Kohima nung 9, Phek nung 1, Wokha nung ana, Longleng, Mon aser Zunheboto nung kaka alitsü," ta State Nodal Officer for Integrated Disease Surveillance Project, Dr. Nyanthung Kikon-i anogoshi sangdongba COVID-19 bulletin nung ashi.

"Tesüiba ghonda 24 tsüngta taneptsü angur nisung 76 liasü, aser itemji Kohima nungi 26, Mokokchung nungi 20, Dimapur nungi 11, Mon nungi 5, Phek nungi 3 aser Peren nungi 1 alitsü," ta pai ashi.

Iba ya ajanga state nung COVID-19 tashidak nungi taneptsü angur nisung 27,904 alitsü, aser taneptsü anguba rate ya shilem 92.38 alitsü, ta ashi.

Tang state nung active cases 778 lir aser item rongnung nisung 135 dak iba tashidak agi timtem agütsüba sümia lir, nisung 9 tera timtema oxygen nung lir, nisung 25 kanga mejungi timtema oxygen nung lir, nisung 7 kangasa mejungi timtema ICU nung lir saka ventilator

meinok, nisung 7 ventilator inoker lir aser nisung 595 dak iba tashidak agi timtem agütsüba mali, ta pai ashi.

Nisung pezü asüba - Dimapur nung ka, Kohima aser Mokokchung district nungi kaka - ajanga tang state nung asüba ajak agi nisung 624 alitsü aser item rongnung nisung 14 bo danga tashidak densema lir, ta ashi.

Ajak senteper COVID-19 agi menepa alir nisung 898 danga state temi ogo, ta Dr. Kikon-isa ashi.

Tang tashinung COVID-19 tashidak alitsü südi ta temolung meleme Nagaland nung sample 325,143 tendangogo. Itemji RT-PCR nung 106,390, TrueNat nung 76,755 aser Rapid Antigen Test nung 141,998 alitsü, ta pai ashi.

Nagaland nung Bodhbarnü tashinung nisung 658,628 nem COVID-19 mozü doses 865,870 agütsüogo, ta State Immunization Officer Dr. Ritu Thurr-isa ashi.

State nung iba mozü agir alirtem ya frontline nung inyaker nisung 60,848, healthcare nung inyaker nisung 15,992, arishi küm 45 tema nisung 193,128 aser arishi küm 18 nungi 44 tsüngta nisung 388,628 alitsü, ta pai ashi.

Nisung 207,242 bo vaccine dose tanabuba agia parnok vaccine course temogo. Parnokji frontline nung inyaker nisung 44,361, healthcare nung inyaker 12,933, arishi küm 45 nungi tema nisung 115,140 aser arishi küm 18 nungi 44 tsüngta nisung 34,808 alitsü, ta Dr. Thurr-isa ashi.

Sovima Village Council ajanga metetdaksür

Dimapur, Rongjui/September 02 (TYO): Chumukedima Circle Chakro Public Organisation senden ka Urta Village nung August 24, 2021 nü amendang pangzüng renemba ama Naga nungter telok balala melungjem tashi mesüra Naga nungteri telemteba ka magi tashi Sovima telungzüik nung telok kata nema shishilempar mesüra kijai 'tax' magütsüsü, ta ajak nem

metetdaksür, ta Sovima Village Council ajanga sangdong ka nung metetdaksü.

Ibai Naga nungteri October 31, 2013 nü "One Government, One Tax" ken o dak sendakba nung telemteba agiba maneni akangshia renemshiba alitsü.

Iba sangdong den mapettsüsa inyakeritem pei khuret asütsü, ta sangdong ajanga ashi.

Class 9 & 10 lapoktsü dept. tejangraba lir: Principal Director

Kohima, Rongjui/Sept. 02 (TYO): Tang academic session atemtsü ita asem jung-majung dang anünga lir aser Class 9 aser 10 nung azüngertem offline class tenzüksü atema Nagaland School Education Department-i molunga lir, saka sorkar telemteba atar, ta osang ka ajanga ashi.

tenasa adanger, kong school tem lapokogo aser Nagaland nung Class 11 aser 12 inyakyima adanger."

"Asenoka Class 9 aser 10 atema school lapoktsüla aser HPC ajanga department dang asüngdangra, phase lemsar lapoktsü ashitsü," ta pai ashi.

Ajisüaika telemteba tatembang agitsü HPC dak keta lir aser kaket rejutem tanaben lapokshitsü imlar, kechiaser tang state nung anogoshi COVID-19 positivity rate ajema lir, ta Sahanavas-i ashi.

State nung Unlock Phase-5 tanü tatembang lir, ajisüaika Chief Minister Neiphiu Rio tekolakba sür aliba HPC on COVID-19 pur senden ano mamen.

Tang academic session atema syllabus ajemtsü asü, ta asüngdang dang, tashidak wara tenasa mechi school temi course metembangtet, ta Principal Director-i langzüa liasü.

Taoba küma Nagaland Board of School Education ajanga state nung aliba school tem atema syllabus ajemtsü aser taküma tekeraba nung telemteba ka agitsü lir.

Dimapur DPDB ajanga project balala agizük



Deputy Commissioner, Dimapur indang Conference Hall nung September 2, 2021 nü Dimapur DPDB senden agiba mapang tangokba noksa ka yangi angur.

Dimapur, Rongjui/September 02 (TYO): Ita shia amenba Dimapur District Planning and Development Board pur September ita atema senden ya September 2, 2021 nü Deputy Commissioner, Dimapur indang Conference Hall nung mena liasü.

Iba senden ya Advisor, Sericulture, Excise and Minority Affairs aser Chairman, DPDB Dimapur, Zhaleo Rio lenisüba kübok mena 2021-22 atema LADP approve asü aser ano LADP kübok tongtipang project itemi agizüka liasü:

- 1-Dimapur I A/C kübok Chungaizaeng Colony, Burma Camp nung Rongmei Council Customary Court yanglutsü.
- 2-Dimapur II A/C kübok Signal Angami nungi Kevijau tashi meter 700 Link road yanglutsü.
- 3-Dimapur II A/C kübok Urta village nung Urta Area Village Union office building yanglutsü.
- 4-Gaspani I A/C kübok Khaghaboto Town nung Rostrum cum open Gallery

yanglutsü.

5. 5-Gaspani II A/C kübok Medziphema Village nung Indoor stadium yanglutsü. Iba senden nung jembiba mapang, COVID-19 tashidak ajanga state nung health, education aser economy sector nung kanga mejungi kongshi, ta Advisor Zhaleo-i ashi.

Ajisüaika Dimapur district Administration, Health & Family Welfare Department aser DTF Dimapur ajanga tajungtuba nung inyakba atema pai tenüngsang agüja liasü.

Lenla ajaklen Dimapur District Task Force-i dangar dak nungi alakteta inyaker aser maneni department ajungai yariteptsüla, aji asünung dang asenoki arutsü südi ta tsüba aliba COVID-19 wave tasembuba ya koktetsü, ta pai ashi.

Tashidak wara indang tenasa, rongsenketzüng tanaben shia arutsü aser mayimjem aliba tesemtem nung iba tashidak indang sangdongba nung tali temolung agütsüsüla, ta ashi aser district nung mozü agir aika aliba (shilem 80 dak tema) atema

pelaba lemsatper aser ano maneni awareness campaign ayongzüka mapang tali meindoki noklang nung noklang shilem mozü agidaksütsü ajungshia liasü.

Dimapur nung COVID-19 tenasa indang osang agütsüba mapang, CMO Dimapur, Dr. Moa Jamir-i ashiba agi, yashi tashinung COVID positive cases 337 liasü aser item rongnung nisung 301 home isolation nung lir, District Hospital Dimapur nung 16, CISHR Dimapur nung 19 aser COVID Care Center, New DC's Complex nung ka lir.

Taküm January nungi August ita tashinung nisung 72,905 tashi COVID-19 tendanga liasü aser yangi nisung 7,412 dak positive puteta positivity rate ya shilem 10.2 lir, ta paisa ashi.

Temaba ketdangsür aser Ministry of Power ajanga totuyuba agütsüba ama Department-i office, towers aser quarters ajak nung Pre-paid metering system tenzüksü, ta E.E. (Electrical Division Dimapur) ajanga senden nung metetdaksü. (Maneni tapak 3 nung...)

Chumu-i District HQ belenba ajanga Naga nungter lungjemtsü: SC Jamir

Dimapur, Rongjui/September 02 (TYO): Dimapur District Headquarters ya Chumukedima-i belenba ajanga Nagaland nung aliba Naga nungter lungjemtsü, kechiaser jila nung aliba kin balala dak kati ka asoshi bilemstüba molungsentsü aittsü aser Chumukedima ya pei indang ama akumtsü, ta Naga nungter yimten yimsüsür tejen, SC Jamir-i ashi.

September 1, 2021 nü volunteer tem den külemi District HQ Complex mürekba nung shilem agiba mapang, pa Nagaland Chief Minister inyakdang par Cabinet ajanga Chumukedima-i district HQ belentsü atema telemteba agiba indang shia liasü.

"Kohima nung Kohima District HQ aliba ama district HQ tem ya Naga nungter jila nung Naga nungter tenüng agüja alidak lir. Dimapur ya Naga nungter tenüng masü aser British nungteri yimsü asüba mapanga parnok indang HQ ya Dimapur nung masü Samagooting (Chumukedima) nung liasü ta asenoki temolung nung ayutsüla."

"Nagaland ya tenem state ka ta züngshir asünung, District HQ ya tenemtsüng len Chumukedima nung alitsü tim ta onoki bilema liasü. Ajisüaika ni state yimtenren yutsüba sülen State Sorkari tesem tesatamba bushia tang aliba tesemi

belentsü lemtet. Adangji nung tang Assam arutsü anasa aliba ama masü, Chumukedima nung tarutsü nung terenlok maparen inyaktüsü sadema lir. Iba tebour tajung ki yanglutsü atema sorkari senotsü jenti indokogo aser iba tesemi HQ belentsü atema nüburtemi anema nokdaksü kuli kecha mali," ta pai ashi.

Iba dak nungi alia, District HQ ya kechi nung lidir liaka ibai kin temeja ka meyong masü ta angatetsüla - ibai district nung teti amenoka alir ajanga meyong lir.

"Chumukedima nung Nagaland nung aliba kin ajanga lir aser Chumukedima-i Dimapur District HQ belenba ajanga yangji alir ajanga adianu ama bilema aser jila nung pei kibur ama bilema ajanga Naga nungter lungjemtsü," ta SC Jamir-i ashi.

"Ni Ao Naga lir, saka ni kü tasoli yutsü aser arogo nung züngsema Ao Baptist Church, Chumukedima-i belen, kechiaser ni Chumukedima nung lia asütsü telemteba agi. Chumukedima nung alir ajungai iba jila nungi amai bilemdaksüner," ta ashi.

"Tarutsü putu tanü lanurtem meyong lir, anungji lanurtemi Administration dang jila timi asameyanga yanglutsü angatetdaksütsüla. Tarutsü asoshi asen dak mangdang alitsüla. Aser asenoki lenmang

tesadem, kilentzü aoba lenmang shidak, tzü agütsüba, anisüngzüksü asoshi parks, school aser college tajung aser mozüki tajung tenzüksüla," ta taoba Nagaland Chief Minister-i ashi.

"Ajak dang tongtipangtibaji asen molungjang nungi kin telemsa samadaksütsüla. Naga nungter ya kibong ka dang lir, saka ken o samesa/tilateri ajak nung asenok rarabangsener. Ibai kanga tia maka lir," ta pai ashi.

Paisa lanurtem dang pei inyakba wadang nung tajungtuba akumtsü ajungshia liasü.

"Israel ya linük tilaka lir aser kanga shisa ajem masüba Arab linüktemi müketbanger lir. Saka parnok molungjang nung tajungtuba asütsü temolungtetba aliba aser tesendaktep tajung aliba ajanga wadang ajak nung renloka aor," ta pai ashi.

Chumukedima ya Dimapur District HQ kumdaksütsüla aser koba belendir Nagaland nung aliba nüburtem asoshi tatishitsü tajung aliba district HQ ka kumdaksütsüla, ta pai yangji aliba nüburtem ayongzüik.

Iba lokti nübudok ya Chumukedima Circle Chakro Public Organisation ajanga ayongzüka lir aser yangji anasa aliba yimtsüngtem nungia volunteer 200 shi arua dena liasü.

Kohima jila nung 'No Parking' mechi shishilembartem mepelar



Kohima, Rongjui/September 02 (TYO): Kohima Smart City Development Limited (KSCDL) ajanga sangdong ka nung Kohima jila kübok Y Junction nungi Razhü Point tashi "No Parking" ozüing benoktsü metetdaksüba asoshi Traders Road Business Association (TRBA) Kohima ajanga tejashi lemsatepa liasü.

Iba tejashi ya September 1, 2021 nü osangbener senden ka Hotel Crescent International, Kohima nung aliba mapang TRBA Kohima convener Peter Rutsa den co-convener Keloungutuo Solo aser treasurer Keneikhrielie Mepfuo nunger lemsatepa liasü.

Nagaland yimtiba nung shishilempar aser entrepreneurs tem tepang agi meshitet timtem balala ajurur aser item rongnung ozüing alema senotsü saruba dena lir aser ano küm ka dak tali COVID-19 tashidak wara agi timtema arur.

Tashidak wara mechi shishilempartem tang tashi shia maruteti aliba mapang KSCDL ajanga Y Junction nungi Razhü Point tashu anogoshi anepdang 6:00 ako nungi aonung 8:00 ako tashi 'No Parking Zone' alitsü aser talisa Old NST area ya nüburtem asoshi recreational park kumdaktsütsü sangdongba ya tejashitsü mapa ka lir, ta ashi.

Iba yagi gari amshiba customer asoshi tebilemtsü tulu ajurutsü aser tatem nung town area nung aliba shishilempar akoksatsü, kechiaser parnok customer temi gari anentsü bushia tesem dangaleni aotsü, ta parnoki ashi.

No Parking akumtsü sangdongba tesem, Traders Road nung gari anenba ajanga garitem senzüba nung timtem magütsür, saka mapang kaka tapi agi gari anenba ajanga timtem agütsür, koba yangji traffic ozüing amshitsü atema Traffic Police yoka alirtemi aziüoktetsü, ta Rutsa-i ashi.

Local Ground indang North Gate, tang teyangludak City Centre nung Old Secretariat Complex aser New NST nung Multi-level Parking amshitsü melaba atema jembiba mapang, item ya khen asoshi dang lir, ta TRBA ketdangsurtemi ashi.

Local Ground ya saisapong aser danga sentongtem akatsü atema lir aser yangji saisapong sentong tenzükra, yangji gari anena ayutsü tasak akumer aser ano City Centre nung ki-o-jen yangluba maparen tenzükba sülenbo gari anena ayuba tesemtem agimatsü aser New NST nung Multi-level Parking ya tang teyangludak lir asünung yangji gari anena ayutsü tesem mali.

Town area nung No

Parking Zone benokba ajanga shishilempar atema sen crore aika akoksatsü, ta parnoki ashi.

Iba tesem nung aliba shishilempar temia Smart Capital City nungiter, saka shishilempar nem timtem agüja jila tiyong nung public amusement parks amenoktsü sentong yabo kanga tai lir, ta parnoki ashi.

Hopta tatemlen nüburtem asoshi tesem latettsütsübo molunga lir saka hopta tepiyong yamaji alitsübo memolunger, ta parnoki ashi.

Iba tesem No Parking Zone kumdaktsütsü atema ketdangsur aser talisa KSCDL ajanga yangji aliba shishilempar den shisa opang melemsatep, ta TRBA Kohima ketdangsurtemi sasa ashi.

Ketdangsurtemi shishilempartem mesüzüktsüa memerangdang, ta parnoki ashi.

Jila nung No Parking ozüing amshitsü sangdongba sülen tawa tentetba TRBA Kohima-i sabang balala aser Kohima Chamber of Commerce and Industries (KCCI) ajanga parnok jashiba lemsatep, saka ketdangsur nungi telangzüba tajung mali, ta parnoki ashi.

Ajak ajungtsü mechi parnok sentong angadanga timi tebilemtsü benettsü onok renema lir, ta parnokisa ashi.

Governor RN Ravi-i Mongmong benjong salem lemsatep

Dimapur, Rongjui/September 02 (TYO): Külem Sangtam kin nungi adianu aser adianutsürtem aser Nagaland nung aliba nüburtem den Mongmong salem lemsatep, ta Nagaland Governor, RN Ravi-i sangdong ka nung ashi.

Alu wadang nung mapa meranga inyakba sülen iba tebour tajung benjong ya alu junga arutsü atema amunger.

Mongmong mapang nüburtem tali lungjemshir, tatok agütsüteper aser pei züsenteba lemsatep, ta pai ashi.

Iba mapang yimdaklirtemi nüburtem meyong ki-o-jen yanglushir aser mürekmejur. Tetsü-tebou yimya nung külem-kejaba ajanga nüburtemi lipajen den yimjung nung alitsü sayur. Temeim, anepalu aser telungjem ya iba benjongmung indang tamendak dak amai lir, ta pai ashi.

Asenek ajaki COVID-19 protocol amshia Mongmong

benjong mungdima aser iba benjongmung nung nübur ajunga anema aliba, tepela aser yimchiyimjung lidakjang ta moatsür, ta Governor Ravi-i ashi.

N S C N / G P R N (Reformation) ajanga sangdong ka nung Sangtam Naga nunger den Mongmong benjong salem lemsatepogo, koba September 3 nung amunger.

Sangtam kin asoshi Mongmong ya tongtipangtiba benjong ka lir. Iba benjong nung kidang sünyanglu aser mimong nung aliba mishi asem kulemer, ta ashi.

NSCN (R) ajanga Sangtam nunger adianu aser adianutsürtem madak Tsüngrem temoatsü lidakjang ta moatsür aser iba benjong ajanga Sangtam nüburtem dangi yimchiyimjung arudakjangma, ta NSCN/GPRN (Reformation) indang MIP (Ministry of Information & Publicity) sangdong ajanga ashi.

State Level Teachers' Day anogomung amungtsü

Dimapur, Rongjui/September 02 (TYO): Department of School Education ajanga State Level Teachers' Day anogomung ya September 5, 2021 anepdang 9:30 ako nungi tenzükra Morung Hall, Directorate of School Education, Kohima nung amungtsü, ta sangdong ka ajanga metetdaksüogo.

Iba sentong nung Advisor, School Education, KT Sukhalu ya tesemdanger tongti ka ama arua moatsütsü.

Tesemdanger tongti aruba sülen pai Teachers' Day flag salatsü aser Director, School

Education, Wonthungo Tsopoe ajanga sentong nung adener pela agizükba o jembitsü.

Special Secretary, Kevileno Angami ajanga sentong tenzükra jembitsü aser iba sülen VVIPs/VIPs nungi aruba salem o azüingtsü.

Kevingunuo Suokhrie ajanga temeja ken ka atentsü aser iba sülen roll of honour alitsü.

Tesemdanger tongti-i o jembitsü aser DoSE indang newsletter sayatsü. Melepzüng o ya Additional Director, Razouseyi Vese ajanga jembitsü, ta sangdong ajanga metetdaksü.



Lenmang majungba agi nüburtem timtemba ngua Longsa village council-i Tuensang road lenjem nungi Longsa School Compound tashi lenmang kanga majungdak yanglushia amungba mapang tangokba noksa nung angur. Iba mapa ya yimer temulungertem rongsen tsükteper yimsüsürtemi angati nübu tenlaa yanglutsür, ta iba osangbeneri yimsüsür ka den jembidang pai metetdaksü. Mokokchung, 2nd September, 2021

DIPR ajanga taoba Director asüba mang ayimer

Dimapur, Rongjui/September 02 (TYO): Anojungi Department of Information & Public Relations, Government of Nagaland nung retired Director, S. Changsang, Imphal nung September 1, 2021 nü asüba atema asükhu lemsatep, ta Department of Information & Public Relations sangdong ka ajanga ashi.

Asür S. Changsang-i Department nung jenjang balala nung tenzükra arur 2002 küm IPR indang Director ka ama mapa nungi anisüngzüka liasü.

Pa ya Department indang Director ama 1-07-1991 nungi 7-06-1994 aser 21-02-1995 nungi 30-06-2002 tashi inyaka liasü.

Pai bendanga agütsür temeim nung Department tenzük aser Department aser sorkar ajungtsü atema anibelem mesasai inyakogo, ta sangdong ajanga ashi.

Department of Information & Public Relations nung ketdangsur aser staff temi pa ya tetemjen aser nendaka inyakba lenir ka ama bilemteter, shiba

ajaki akumtsübu aser sabua liasü.

Pa asüba takoksa ya memelentetba ka lir, saka rongsen agi malangzüktetba mapa jenti pai inyakba teti bilemtetsü, ta ashi.

Department nung ketdangsurtemi anir staff temi Asür S. Changsang'er kibong den asükhu lemsatep aser parnok mangyim tia nung alidang Tsüngremi tashi tasen aser anisüngzü agüjang ta sarasademtsür, ta DIPR sangdong ajanga ashi.

Tanü Dimapur nung aliba lokti balala den NFHRCC senden amentsü

Dimapur, Rongjui/September 02 (TYO): Dimapur nung amenoka aliba Tribal Hoho tem, kaketshir telok balala aser temolungertem den shisadokten senden ka September 3, 2021 nikongdang 2:00 ako nungi tenzükra Kharmahal, Dimapur nung aliba asen base Office nung akatsü lir, ta Nagaland Foot Hill Road Coordination Committee (NFHRCC) züngsem ajak dang sangdong ka ajanga nenshia metetdaksüogo.

NFHRCC dak sendakba nung Nagaland sorkar nem tezüluba nung ita ka mapang agütsüba süyitemba sülen

Principal Secretary, Road and Bridges (PWD) nungi September 1, 2021 nü shidi ka yoka, Chief Minister aser Dy.CM (Minister, Home, R&B (PWD)) naprong Official duty atema tang New Delhi nung oa aliba ajanga parnok maru tashi longkak maiti atatsü aser tajungba lenmang bushitsü atema külemi mener jembishitsütsü ashiba atema pelar, ta NFHRCC convenor Supu Jamir, General secretary W. Lemba Chang aser Asst. Gen. Secretary Chenithung Humtsoe nungiertemi kasa sangdong nung shia liasü.



Rashtriya Poshan Abhiyaan kübok sendaktepa aliba department balala senteper akumba Block Convergence Action Plan Committee pur senden ka September 1, 2021 nü Mangkolemba ADC Office nung mena Poshan Maah, (September 1-30, 2021) Poshan Rally tenzükra liasü. Iba sentong nung Kedalu Sebu EAC HQ., SMO CHC, CDPO aser ICDS nung inyaker, Panchayat züngemtem, lanur lenirtem, AWWs aser AWHs temi shilem agia liasü

Meghalaya CM Conrad Sangma-i PM Narendra Modi den ajurutepe



Meghalaya chief minister Conrad Sangma-i Hombarnü New Delhi nung Ato Kilonser Narendra Modi den ajurutepeba noksa nung angur.

Shillong, Rongjui/September 2 (Agencies): Meghalaya chief minister Conrad Sangma-i Hombarnü New Delhi nung Ato Kilonser Narendra Modi den ajurutepego. PM Modi den ajurutepeba mapang Meghalaya CM Conrad

Sangma-i pa dang taruba kum January 21 nü state kümteter kum 50 ajungba benjung nung arua adentsü jaoka liasü. Meghalaya taruba kum January 21 nü state kümteter kum 50 ajungba benjungmung amungtsü.

CM Sangma-isa, senden nung Meghalaya nung terenlok maparen balala inyakyonga oya aliba indang Ato Kilonser nem metetdaksü.

Meghalaya CM-isa, Shillong nung Assembly ki tasenba yanglua aliba indang Ato Kilonser Modi nem metetdaksü.

CM Conrad Sangma meina Meghalaya Speaker Metbah Lyngdoh oa liasü.

"Hon'ble Prime Minister, Sh @narendramodi den ajurutepego aser 2022 kum January 21 nü Meghalaya state kümteter kum 50 ajungba benjungmung nung arua adentsü jaokogo. State Assembly ki tasenba indang pa nem metetdaksütsü asoshi maongka nguogo aser GoI dang senotsü teyari meshiogo. Pai nongita yariba atema kanga pelar," ta CM Conrad Sangma-i tweet asü.

Assam kübok tesem ana nung temesepba mozü apu

Guwahati, Rongjui/September 2 (Agencies): Assam police-i shishilembadak sen crore 17.5 alang Heroin puogo.

Temesepba mozü ya Guwahati anasa Jorabat tesem nung tata gari ka nung bena lia Assam police-i apu.

Police temi heroin seret 2.5 soap cases 205 nung bener lia apu. Temesepba mozü ya shishilembadak sen crore 17.5 alang asütsü.

Temesepba mozü ya tata gari totsü tank nung meima bener liasü.

Temesepba mozü shibelenba indang osang tejangja angazükba sülen Police temi iba tata gari ya

sota bushisüngdang.

Iba ken o dak sendakba nung nisung ana pua lir.

Police-i pua alisa ana ya Dimapur nungi Dipak Sarma aser Manipur nungi Jamminlal ta jangjaogo. State nung temesepba mozü shibelenba inyakyim raktoktsü atema iba dak ajemdaker ken o maneni bushisüngdangdar.

Kasa mapang nung Karbi Anglong police-i, East Karbi Anglong kübok Assam aser Nagaland na arrtsü nung SUV gari ka nung Heroin bena lia puogo.

Osang ajanga ashiba agi, Karbi Anglong police-i Bodhbarnü bolero gari ka Lahorijan Patrol Post jakdang

sota liasü.

Gari bushisüngdangba mapang police temi soap case 50 nung heroin gram 646 bena aliba ngutet.

Temesepba mozü ya gari tesülen tail light nung kanga junga meima bener liasü.

Ken o bushisüngdangba mapang temesepba mozü ya Manipur nungi Guwahati bener oya liasü ta ngutet.

Iba dak sendakba nung Ngamsei Haokip, 30 aser Letkholal, 47 na puogo. Tenaprongla Manipur nungi lir.

Iba inyakyim ya Lahorijan PP SI Manujjal Gogoi lenisüba nung inyaksangshia liasü.

Dimapur DPDB ajanga project... (TAPAK 1 NUNGI...)

Naga nungeri electric bill tem agütsütsü yimya mesüba, anungji Pre-paid metering system ya benokba sülen nüburtemi power kumdanga amshitsü angatetsü, anungji tarutsü nung power tajungba akumtsü, ta EE ajanga ashi.

Paisa system tasenba amenokba mapang police densema ketdangsür ajungai amalitep alitsü ayongzüka liasü.

Iba mapang Commissioner Police, Dimapur, Rothihu Tetseo, IPS ajanga department nem nübu peria agütsütsü ashi.

Power auyaba nungi kumzüka alitsü atema Tetseo-i ali telung nung yinzü abentsü mesüra sealed wires amshinung ajungtsüm ta ashi.

Züngsemtemi office ajanga ita shia electricity bill agütsüba nung timtem ajangshibatem lemsatep, kechiaser rent, rate taxes atema sorkari kum nung khen dang agütsür.

Sorkar meyong office tem atema bill achayanga atatsü asoshi department-i sentong ka yanglutsüla, ta Dimapur DPDB züngemtemi benoka liasü.

Pre-paid metering system ya mera tajung ka lir, saka department ajanga bill shidak agütsütsüla, ta Advisor Zhaleo-ia ashi.

Iba senden nung taoba senden nung lemtetba onüktem lepa repringshia liasü, school lapoktsü aser upgrade asütsü mela, Excel

Children School tenung Dzuvian School melentsü mela, Charisma School, Circuit House Colony, Dimapur, St John Higher Secondary Residential School Diphu Road, Indisen Village aser St.Tetesa's Little Kingdom, Fellowship Colony Dimapur nem Grant in Aid atema sorkar dangi aben.

Taoba senden nung nungloktsüba ama Agriculture Department ajanga tang teinyakdak scheme aser sentongtem indang PowerPoint presentation agütsü liasü.

Taruba senden nung Department of Fisheries ajanga department inyakyim osang agütsütsü nungloktsü.



Brehostibarü Red Horns Artillery Brigade-i Dimakuchi nung Swarnim Vijay Mashal agizükba noksa nung angur. Vijay Mashal ya gari aika den motorcyclist 200 dak temai Hattigor Military Station-i meiner oa liasü.

Tripura nungertemi state nung TMC renlokdaksüner: Sushmita

Agartala, Rongjui/September 2 (Agencies): Tinamool Congress (TMC) lenir Sushmita Dev-i, Tripura nung aliba nüburtemi state nung TMC renloka odaksüner, ta ashi.

TMC lenir Sushmita Dev, shiba tang Tripura nung anogo 15 atema oa lir, lai ashiba agi, state nung aliba nüburtemi TMC renloka BJP anema nokdaksüner.

Ajisüaka lai, Tripura nung party tashi ita yangertsü atema temela masütsü, ta ashi.

"Tripura nung aliba nüburtemi TMC tashi taitba kuma renlokdaksüner. Ajisüaka idaki party tashi ita yangertsüji temela masütsü," ta Sushmita Dev-i ashi.

Sushmita Dev-i ashiba agi, 2018 kum Tripura nung Assembly elections magi tsüngda BJP-i tenangzüka

aika agütsü, ajisüaka taoba kum asem tsüngda item tenangzükbatem atalokja mali.

"TMC pur Tripura nung BJP aser parnok yimsüsüba tembangdaksütsü atema yimden yimsüsüba nung tetsüng ajemokogo," ta Sushmita Dev-i ashi.

Laisa, Tripura nung Left party tem aser Congress inyaksangshi mesüi kumogo, ta ashi.

Maneni lai, BJP part züngsemtemi mapangshia TMC worker tem amakba indang ashishia liasü.

Sushmita Dev aser TMC lenir tejen Bratya Basu na state nung party tashi itshidaksütsü atema anogo 15 asoshi Tripura yimtiba Agartala tonga ogo.

Brehostibarnü Sushmita Dev-i, Tripura kübok Udaipur tesem nung Tripureshwari Temple semdanga liasü.

Tripura assembly speaker Rebati-i mapa toktsüogo

Agartala, Rongjui/September 2 (Agencies): Tripura Legislative Assembly Speaker aser BJP lenir tejen Rebati Mohan Das-i Brehostibarnü deputy speaker Biswabandhu Sen nem resignation shiti agütsüogo.

"Nija khuret kar aliba ajanga ni deputy speaker Biswabandhu Sen nem kü indang resignation shiti agütsüogo," ta Das-i EastMojo dang ashi.

Das ya taoba mapang CPIM lenir ka liasü aser pai 2016 kum party toktsür BJP nung oa aden aser state assembly election mapang pa nem Pratapgarh assembly constituency nungi tokteptsü atema ticket agütsü.

State chief minister linük yimtiba nung administrative senden nung shilem agia aliba mapang iba ya atalokogo.

Tripura nung BJP-IPFT party-i teloktep sorkar kümtetba sülen Das ya speaker aküm. Ajisüaka iba inyakyim dak aikati temulung masü aser BJP MLA



Rebati Mohan Das (File photo)

tem desema legislators aikati pa aibelen tuteta shiogo.

Kasa mapang source balala ajanga ashiba agi, Khayerpur assembly constituency nungi BJP MLA Ratan Chakraborty-i taruba assembly session nungi pa melenzüktsü, koba September ita tatembangbuba hopta tenzüktsü.

Mongolbarnü MLA asem; Ram Prasad Paul, Sushanta Chowdhury, Bhagaban Das nunger state cabinet nung bendenlokogo.

Guwahati nung tetsür ka tepsetba ken o nung aija alisang puogo

Guwahati, Rongjui/September 2 (Agencies): Arishi kum 15 tain Dimple Kumawat tepsetba sülen anogo ka lir iba ken o nung aija alisang Abhishek Gupta police temi Brehostibarnü puogo.

Iba ken o nung police temi temulung melemi bilemer asem pur liasü. Abhishek Gupta aser par medemer Karan Das aser parnok aliba kidang alir ka ta police temi Brehostibarnü ken o ashishitsü atema sota yur liasü.

"Aibelena alisang Abhishek Gupta puogo. Pa ya tetsür laer kinunger liasü. Ken o ashishitsü atema ano nisung ana jaoka liasü," ta Investigating Officer Rajveer, DCP Central, Guwahati Police-i EastMojo dang ashi.

Tetsür la dak teka sangshiba indang ashishiba mapang pai

ashiba agi, tena asatepba sülen tetsür la yagi Abhishek dak ama. Iba sülen pai tetsür la dak tekolak nung tepoktsü aser kotari agi temang nung tsünga liasü.

Police temisa, tetsür la tepsetba sülen aija alisang yagi mima ayuba mobile phone aser SIM card ngutetogo ta ashi.

Dimple ya Bodhbarnü 11 ako shi nung tepset. La tepsetba mapang nung lar tsürapurtem kidang maliasü. La azü agi melangbanger lia lar kinunger kati angu. Dimple ya Kharghuli nung alir ka liasü. La tebu-i Bodhbarnü nikongtsütsü Latasil Police station nung ken o ka benoker liasü.

Iba tatalokba sülen police temi ken o bushisüngdang tenzük aser ghonda 36 majung tsüngda ken o nung aibelena alir puogo.



TIR YIMYIM YIMOBILEM (EDITORIAL)

DIMAPUR YROGONÜ, RONGJUI (SEPTEMBER) 03, 2021

Asayartem yaritsüla

Tawa Tokyo Olympic nung takok angurtem nem pei state-i tepela tulu sayua senpet sen crore dak tali agütsüba den police department nung tular kümdaktsüba asenoki noksa nunga dena ogo. Item takok angurtemji kari taret ajungshishiba nung, kari tsüngshishiba nung aser kari tsüngtepba nung ta asaya tapu balala nung asayartem liasü. Item rongnung Manipur tsür Mirabai Chanu Tokyo nungi arudangbo yimten yimsüsür tulu ka arur ama, tayimtsü anendak nungi la agizüksü asoshi garisa gari aser nisungsa nisung adenshia tenüngsang tulu agüja agizüker külenang, joko la Police department nung Dy.SP kümtsür liasü aser la iba office jagi Manipur chief minister-i anir orr mendaktsü. Ano, kasa asayamong nung Assam tsür Lovlina Borgohain-i tsüngtepba nung takok anguba atema la nema Assam government-i sen senpet aser government mapa agütsüba dang masü, Tokyo nung lai takok anguba osang angashili aruagi Golaghat district nung lar yimtak leni aoba lenmang lishi aser motzü agi tesenzü majung liasüba ngua, parnok MLA-i iba lenmangji kanga junga yanglutsü, anungji lai asaya nung takok anguba ajanga la dang masü par yimer dena manger sangwa nung meimlaba temoatsü aser tajangzük tuluka angu. Item denji kodang asenok Nagaland state nung asayartem aser asen government-i inyakba mapatem medemdangdir, tangar dangbo ashitsüla masü, asen o asen na jembir ajungshiteptsüba dak alaka, tang tashibo state government-ibo Nagaland nungi Naga nunger asayartem tangar alima kintem den toktepdaktsütsüsa renemtsübabo mangur. Ajisüaka, Naga nunger lanur aikati pei merang meranga pei dak aketba sempet mesamadaktsü alima tesem balala nung asayamong tapu balala nung shilem agidang takok tajung bener aruba asenoki angur. Item rongnung tang tatsük talem osangji, taoba hopta nung Kyrgystan lima nung Global Association Mixed Martial Arts (GAMMA) Asian Championship asayamong nung Longtsükümba Ao, Arsenba Ozüküm, Limasünep Imchen, Kekhrieneitso Angami aser Mairidin Newmai nungertemi shilem agiba osangji asütsü. Item rongnungji Longtsükümba, Kekhrieneitso aser Arsenba nungertemi takok tajung bener aruogo. Parnokji tanü putu nung nokinkertem lir. Tanga lima nungbo iba Mixed Martial Arts (MMA) asayartem ya kanga nungtugusa amshir aser parnok asayaba takok jenjang atema asen aika amshir. Parnok denji ano kasa mesüktepba asaya Kickboxing Championship 2021 asayamong nunga Wb. Bendangyanger Longkümeri takok tajung bener aruba osang angashiogo. Parnok ajak ya asaya angazükdak parnok nungdak ajak angutsüsa tesem kata maka aser senotsü nunga anüngakonga alirtem lir. Parnok ajakji kinunger, yimtsür yimer aser tangatettertem kari tenla bendentsüba agidang orr shilem agir arubatem lir. Aji oda, asen government-ibo parnok taobaa memetet aser tarua memetet, tang tashi nung Chief minister aser Nagaland Olympic Association nung tir, Wb. Neiphu Rio-i mobile phone (twitter) ajanga tenüngsang agütsüba dak alaka government nungibo sen sempet agütsübaa mangashi aser government mapa agütsübaa memetet. Kena, nübertem ajak tenüng nung Dimapur nung alir Longsa senso tajungtemi Wb. Longtsükümba aruba anogo nung tayimtsü anendak tashi tuagi washia tenüngsang agüja agizükba jagi asenok ajak nümadangtetogo aser ibaji ano temoatsü aser takok jazükba sentong ka asütsü. Iba amaji nübertem pelaba aser jangraba reprangteta, asen state government-ia among aden oagi tangar kintem den asayadang takok tajung bener arurtem nem yabo, parnok ajungshia tebang agi tenüngsang agütsüba den ano tangar state-temi inyakba amaji sen sempet aser government mapa agüja akümtsüba tushira, iba jagi Nagaland nungia lanurtem asaya tapu balala nung tangar den takok ngua tokteptetsüsa aika adoktsü. Lanurtem asaya nung jangradaktsütsüba nükjidongji aika lir, item rongnung tongtibang kaji asaya nung takok angutsüba dang masü saka kodang lanurtemi asaya nung temulung agütsüdir, parnok temang anema alitsü. Atangji, tajung inyaktsü aser konang nüngsang agütsütsü kecha temenu maka, anungji state government-i itemji temulung nung yur sentong tajung yanglua parnok tushitsü imlar. Asaya ya ka dang masü, aika lir, anungji lanurtem rongnung pei jangraba asaya asayatsüsa state government-i, tang nungi danga, pei kija agitsü inyaker ama bilema kanga temulung agüja anepalutsüla.

OLEMSABANG

ABAM 150 Jubilee Mung Sülen Kechi Inyaktsü?

- Matsüng Longkumer (Osang Zülur)

(Yashi adok nungi...)

c. Secular Institution

Tamanger ka liromedema aintsü asoshi shisatsü aser tangatetba tajung agütsütsü nungdaker. Aor limadang Land of Pioneer ta ajar saka reprangdangra iba nungja ya otsü dang kümogo ta aikati nemjemer. Iba ya asenok ajak khuret lir. Mokokchung District ya shisaluyimtak tesem (Education destination) kümdaktsütsüla. Tanü tashi nung Aor litsü nung BA dang graduate sütetter. ABAMi achaayanga Aor litsü nung shisumuludak/ angazükdak tajung lapoktsü kanga nungdaker ta YSS sabang nung jembir aikati tebilemba lemsatep. Asen Aor litsü nung secular education asoshi top class college nungdaker. Clark Memorial Higher Secondary School ya danga junga khen molushi nung koda? ABAM 150+ nungbo CMHSS ya mission nung tongtipang ranglokdak sür university tashi ajungkettsü policy kar yanglu nungbo koda jungla? Asen lima shisaliok riju (institution) aser university tajung maliba yong lanurtem bendang leni aotsüsa akümer aser ibai ajanga aisü nung, talisa lim arogotem nung, tetsükdaktsüajurur. Talisa Ao Arogotem nung sannüker tebilemstü tulutiba kaji tanur shisaluyimtak ya lir. Iba yongji sannüker aika kibong balala alitsüsa adoker. Ao Arogo nung tenzüker chirtem CMHSS nung azüngtsü ajungshitsüla aser arua züngdaktsütsü asameyang yanglutsü. Iba ya ajanga tebilemstü aika samatsü.

ABAM 150+ aser Shi Temang Anepaluba (Medical Health)

Nisung ka shi nung anema alibaji Arogo aser lokti asoshi tongtipang. Tanela den külemi shi anepalutsüji Arogo ka teinyaktsü mapa. Yisu pa alima nung alidang tanela nung dang masü shi nung shiranger taneptsü agütsüba asenoki meteta kar. Iba tangatetba nung America nunger medical missionary arua asen lima hospital tenzüka tanü asenok tajangzük jendi angur. Tat.agi, 1900 nung Ida Scudder-i Christian Medical College, Vellore lapokba, mesüra Dr. J.R. Baileyjangalmpur Christian Hospital 1912 nung tenzüksü. Iba Hospital ana tsüngda küm 12 tepila dang lir saka CMC Vellore ya India nung ajaki sabua sendenba nungtoko hospital ka kümogo. Asen ICH ya koda asü aser koda asütsü?

Mokokchung District nung Hospital tajung maliba ajanga tapayutsü taküm aika anungji asüba asenoki ajangshir. Iba den külemi bendang lima rongsen jendilaluba den, aiben sen apur, rongjenseta shikmani agiba ajurogo. ABAM 150+ nungbo iba ya tenyaba mapa rongnung ka sür ao nung kanga ajungtsü. Tat.agi, Impur Christian Hospital ya Medical College level tashi yaktasa ajungkettsü nükla ayu nung ajungtsü. Christian Medical Association mesüra corporate Hospital kar den longjemer ICH ya multi-speciality aser research hospital jenjang yanglutsüla. Yamaji takok ngua inyaktsü leman peria dang lir. Ibai ajanga Aor dang masü temeket kin aser bendang balala tejangzük angutsü. Tesem tezü anungji shiranger marur ta kari bilema temulung ilaa alitsü akok saka facilities dang tajung agütsüra shiranger arutsü shisabulu mali.

Iba ya kodang junga amenlokdir leman aika nung teyari angutsü. Tat.agi, shi nung taneptsü anguba dang masü saka pastoral clinical counselling mesüra psychological counselling training agütsütettsü, mental health anepalutettsümesüra rehabilitation center ama a.a. lapoktettsü.

Otem :

Jubilee sülen kechi inyaktsü (?) ta asüba ya nisungi masü Tsüngremi asüngdang ta asenoki angajemtsü nungdaker. - K. Temjen Jamir.

Iba ya kanga tongtipang kechiba süra Jubilee ya nisungi puratetba mung ka masü saka Tsüngremi nungloktsüba amung ka lir (Levi 25:10). Anungji ABAM 150+ nung kechi inyaktsü, koloni aotsü, mesüra mangdang kechi asütsü ta asüadang nisungi molungba masü mesüra sobaliba agi alena ayuba masü, saka Pa sentsüwangshi asoshi Tsüngremi kechi inyakdaktüner ta tamanger ajaki sarasadema shisadangtsüla. Iba ocet nung aliba ya teteyuba ka masü mesüra meinyaker ta ashir masü mesüra tesa kenyongi tasen bener aruba masü saka inyaka aliba, aser mayimjemi alibatem tajungba bener aotsü asoshi shisa lemsateper dang.

ABAM 150 sesquicentennial mamung tashi aser mungger külen ABAM ajanga Tsüngremer wadang tuluba nung bener aotsü tamanger ajak sarasadem südi. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Peren nung VCP-i osangtajung kensep 'Apei Kehung' saya



September 01, 2021 nü Peren Baptist Arogo nung osangtajung kentener telok Voice of Calling Peren (VCP) indang kensep tasembuba "Apei Kehung" sayaba sülen tangokba noksa nung angur.

Dimapur, September 02 (TYO): Osangtajung kentener telok Voice of Calling Peren (VCP)-i September 1, 2021 nü parnok indang kensep tasembuba "Apei Kehung" sayaogo.

New Peren Baptist Church nung iba kensep sayaba sentong agia liasü. Iba kensep ya K. Elu Nding tebu, asür Tsibam Elu Nding sür küm 44 ajungba anogomong nungtem nung saya aser Elu-i iba kensep sponsor asü.

Okila jembidang VCP Director, Dr. Hiazuheing Nding-i VHP tentetba ostü tongmelang agi metetdaksü. VCP telok ya 1993 küm October 22 nü tentet aser 1994 küm parnoki mezüngbuba kensep "Gwanglo Keku Ko" saya, iba sülen tanabuba

kensep "Voice of Calling Peren" sayaa liasü, ta paisa metetdaksü.

Director-i tamalen kensep ana adoktsür sponsors dang pelaba metetdaksü. VCP telok nung züngsem ana asüba bilemteta pai akhüm agütsü aser asür ana kinüngertem nem commendation certificates agüja liasü.

Kasa sentong nungsa asür, Tsibam Elu Nding'er jabaso tambusang, Raitu Elu Nding-i tebu taküm otsü tongmelang agi lemsatepdang pai, tebu ya limapur ka liasü saka tesülen tebu Khristan yimsü agizük, ta metetdaksü.

Sentong nung Elu'er kinüngertemi ken ka aten. Peren Baptist Arogo nung pastor, Rev. Suitei Nding-i kensep tasenba meshiteta

sarasademtsüba sülen Dy. Commandant 9 NAP (IR) Bn. Saijang, Rezulule Nding-i iba kensep sayatsü.

"Osangtajung kentem ajanga alima tesem ajungalen taküm melenshidaksür," ta lai ashi.

Lucy Herie-i kensep tasenba nungi "Apei Kehung" ken aten. Iba ken ya K. Elu Nding-i tebu bilemteta mejemba ken lir. Pa launua asüduyongu tebu asüba sülen pa lajar aküm aser iba ken ya pai tebu den ajuruteptsü yongyaba ken ka lir.

Iba sentong ya Samteina Nding leniba nung agi, New Peren Baptist Church Pastor, Namrengong Sephe-i sentong tenzüka sarasadem aser lokti sarasadem agia sentong tembanga liasü.

Gospel for Asia-i Afghanistan atema sarasademtsü ayongzüker

September 02, 2021: Alima nung Khristan mission organizations tulutiba rongnung ka - Gospel for Asia (GFA World)-i alima tesem balala nung Khristantem dang, tang Afghanistan nung kiralongra, tashiyim amshia taküm raksatsüba aser nisung tepsetba mapang nung Khristantemi kecha masü ama malitsüla, ta metetdaksü.

Gospel for Asia (GFA World)-i alima tesem balala nung timtemer nisung million aika yarir, aser iba telok tentetsang, K.P. Yohannan (Metropolitan Yohan)-i, "Afghanistan nung tai maketertem Taliban yimsüsüba kübok timtemba mapang nung alima nung Arogotemi kecha masü ama tekülem magitsü mesüra sarasadem masütsü ta ni amanger," ta metetdaksü.

"Tang mapang ya asenoki apudaker Afghanistan atema sarasademtsütsü nungdakba mapang," ta paisa metetdaksü.

US aser NATO sepai ajaki Afghanistan toktsür aoba sülen Yohannan-i Khristantem

dang iba linük tensa atema lumia sarasademang, ta mepishi.

"Kobi melii Afghanistan aser tanga linüktem nung kiralongrartem ket nung Khristantem densema tai maketer kwi asütsüar ni meshitettsü. Item senti nisungtem, tetsürtem aser tanurtemi asenok sarasadem tang taliba nungdaker," ta pai ashi.

"Khristantem dang masü saka Afghan nungger ajak tetsübu nung lidar. Joko tetsüba hopta ka dak tali nisung jenti lisem lima nung jenshia senzüdar ta ni osang tejangja angazükogo, aser parnoki linük toktsür jena oner," ta pai metetdaksü.

Osang angazükba agi, Afghanistan nung Taliban teloki Khristantem aser tamalen US den amalitepa inyakertem bushidar. Teburtem iba tesem nungjisa tepseter, tetsürtem tashiyim amshia raksatsür aser tanur tetsürtem alar ama anir aoer.

"Afghanistan nung nisung aikati parnoki asüng anogo majurutsü, ta bilema tsübur.

Parnok kishizüng nung akoshibaji tatembang asütsüa akok," ta Yohannan-i ashi.

"Afghanistan nung asen adianutem Taliban yimsüsüba kübok tetsübu nung aliba mapang asenokbo kecha masü amai meliteptsüla. Kodang asenoki tangar timtemji chichia asenok dak ataloker ama züngshidir, idangji Tsüngremi mapa inyaker. Tang mapang ya asenok apudaker sarasademtsü mapang," ta paisa metetdaksü.

Gospel for Asia (GFA World) ya alima nung Khristan mission agency tongti rongnung ka lir. Parnoki alima tesem balala nung, talisa Asia aser Africa na nung nisung million aika shi aser tanela nungdak naprongla peritsür aser Tsüngremi temeim lemsateper.

Yaküm kija nunga GFA World-i community development projects aika inyaktsüogo, yimtsüng 1200 nung angati medical camps katsüogo aser tzü tajung atsütetba tzübo 4,800 yanglutsüba den nungdakba kibong 260,000 nem Khristmas sempet agütsüogo.

ANOGO ABEN TSÜNGREM DEN

Tongpang rara mesüra tazüokba?

Kechiaser Kibubai shiba dang meimer pa merenshir aser Pai agizükba techir ajak dak azüker. Ibr 12:6.

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agientsü aikati Tsüngrem dang asüngdang. Parnok timtem tebilemetsüji Satan mesüra tanelaren kechi prok aji arur (Gal. 6:7) ta agizükdang nungibo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatettsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaktsütsü akok. Na tenzüng nung ochi meshira na melenshitsü asoshi iba nungi adokbaji nai agidaktsütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nungdak temelenshi adokdaktsütsü asoshi Tsüngremi na azüoker. Ne tebilemetsütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritettsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüksü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

Myanmar nung sepai yimsüsüba kübok Arogotem timtemer

September 02, 2021: raksatsü.

Myanmar kübok Chin state nung sepaitemi maneni Catholic aser Baptist Arogotem anema inyaker; Myanmar ya Buddhist nütsüng timba aliba linük süaka Chin state nungbo Khristan nütsüng timba lir.

Tesüiba ita ana tashi Chin state kübok Taal yim dak Baptist Arogo Tenla ki ka nung August 31 nü sepaitemi iba Tenla ki toktsür aotsü mapang nung Laishiba aser osangtajung ken kakettem indokja liasü.

Sepaitemi iba yim toktsür aotsü mapang nung ki aika raksatsü; iba mapang nungji Khristantemi pei ki toktsür ajenba sülen parnok aika meyipa maru.

Chat yim nunga sepaitem St. John Catholic Arogo Tenla kidang liasü aser parnok taotsü mapang nung parnoki Tenla kidang osettsüset aika raksatsü. Sepaitemisa Chat nung aliba Baptist Arogo Tenla kidang Laishiba aser generator

Kachin, Kayah aser Chin state tem nung Khristantem tesüiba küm 50 dak tema reshikangshi tia nung lia arudar. Chin state nung sepaitem aser sepai yimsüsüba anema nokdakertem tsüngda rara tesashiba akümba ajanga Khristantem kanga timtemer.

Iba linük nung Khristan Arogo aikati sepaitemi Tenla kidang yi ajemba aija, iba ya Geneva Convention telemtetba anema inyakba lir, ta aitsüogo.

Chin lisopur temeden atema inyakba telok- Institute of Chin Affairs-i sepaitem dang meimchir temeden anema inyakba mapatem ya anentsüla, ta takhangba agütsüogo.

February 1 nungi sepaitemi yimsüsüba tenzüksü sülen Chin nung 108 tepsetogo aser asürtem rongnung tanur 14, tetsür tenet, civilian 57 aser sepai anema nokdakba telok balala nungi nisung 51 densema lir, ta Institute of Chin Affairs-i metetdaksü.


OLONG PAITEP # 5925

1		2		3		4	5			
				6						7
		8								
9				10		11				
			12						13	
						14				
16						17				

TIPILEN		LANGTSÜNGLEN	
1. Nisung jenti - (5)		1. Tenük telong - (9)	
4. Tsük rudenba - (5)		2. Committee dang ajar - (5)	
6. Temzüng tesashi - (5)		3. Yagi ki okdoker - (7)	
8. S _ _ _ i - (3)		5. Yim lenmang - (5)	
9. Nisung telemsa - (3)		7. Temoatsü keter meyipa aruba - (9)	
10. Anogoshi - (4)		11. Kanga junga menemba - (7)	
12. Ajanga aor - (4)		12. Majinü - (5)	
13. Tsük rizüngdak - (3)		13. Tzuma nung senzuba - (5)	
14. Tebang nungi adokba - (3)			
16. Süngdong tatembangtiba - (5)			
17. Meputep - (5)			

OLONG PAITEP # 5924 TELANGZÜBA

TIPILEN :	LANGTSÜNGLEN :
2. Bangsemo, 6. Tiptem, 8. Jen,	1. Yipten, 3. Nüja, 4. Sangro, 5. Milen,
9. Talila, 11. Aren, 12. Tzübo, 14. Alia,	7. Tulu, 10. Laza, 11. Aben, 12. Tiyong,
16. Angati, 17. Odi, 18. Azü,	13. Ajizük, 14. Aitsü, 15. Tasa, 16. Aina.
19. Sünglang.	



ALOKBA-I MODI DANG KANGA JASHIA PHONE ASÜR

Alokba : Hellooo...Ni Mr. Alokba... Ni Prime Mister Modi-ba den khen jeminur aja...???

Modi-ba : Hello...Ni Prime Minister-bai langzür ako...Hang na kechi shirnur'ar shiangjo ???

Alokba : Sir...Ozü Naga nunger nem 'Solution'-to kodang agütsüsüba.... Yamai menua ayur ...??? Ozü Naga nunger MLA-tem to 'Solution' meji nung opposition maliba sorkar ka yanglur kazütepdar-kodi.... Ashiko ano tera menu nungbo linük tenzükertem-jia 'Faction' talila ka akümtsüba atongtet nungbo...!!! ...ta shisabulur.... Kechiba süra linuk tenzükertembo ka küma longjemer nokdak nungang takok angutsüba sernung longjemtsü tasak.... MLA-tembo 'Rulling' o 'Opposition' balala lemsar nokdak nungang nubur ajangzüksüba sernung... Parnokbo mela-mela ka küma longjemogo.

Modi-ba : Ena...Ner Naga nunger Solution-ji ajak tik-tak renemer...Joko bener yoktsüba dang jungjunga aleper yua lir...Saka ni tsüba bilemba kaji...Solution talep jagi ner Naga lima matongdang... Ner Naga nunger raratepa/kahtepa sumatsü tsüba bilemer aja.

Alokba : Eeessh...Nai yakta meyokra onok China - Japan - Korea nunger ajaki arung ta ajar-ji Parnok dangi aotsüba...Bedding-siting ajak tik-tak renemer tapusotsüba tang lirko-di.

Lilir : L. Kika Pongener.

TANÜBO NAI LANGZÜANG

Q. _____ nung World Resources Institute indang headquarters amenoka lir.
 A. Washington DC B. Florida C. Texas D. Alaska

===== (Taruba adok nung onoki langzüksü)

YASHI ADOK TELANGZÜBA : Manipur

AO OSHI ANGAZÜKDAK:

TANÜ ANGAZÜKTSÜBA OJANG



Kurep
 (v) tatem tashi akushia raksa (break completely into pieces)
 * Longtepertemi long tuluka **kurep**.

Kurepa
 (adj) süngdong nung süngjang aika atangba (heavy laden branches with fruit)
 - Asen lima nung metoklashi **kurepa** alua atanger.

NAI-A YA METETTER MA?

SEPTEMBER ITA NETFLIX NUNG SAYATSÜ ALIBA MOVIE ASER SERIES KAR:

- Dive Club - Netflix Family
- Money Heist Part 5: Volume 1 - Netflix Series
- Sharkdog - Netflix Family
- Countdown: Inspiration4 Mission to Space - Netflix Documentary
- Untold: Breaking Point - Netflix Documentary
- The Circle: Season 3 - Netflix Series
- Blood Brothers: Malcolm X & Muhammad Ali - Netflix Documentary
- Kate - Netflix Film
- Lucifer: The Final Season - Netflix Series
- Metal Shop Masters - Netflix Series
- Pokémon Master Journeys: The Series - Netflix Family
- Jack Whitehall: Travels with My Father: Season 5 - Netflix Series
- Schumacher - Netflix Documentary
- He-Man and the Masters of the Universe - Netflix Family
- The Father Who Moves Mountains - Netflix Film
- Squid Game - Netflix Series
- The Stronghold - Netflix Film
- Love on the Spectrum: Season 2 - Netflix Series
- Dear White People: Volume 4 - Netflix Series
- Monsters Inside: The 24 Faces of Billy Milligan - Netflix Documentary
- Blood & Water: Season 2 - Netflix Series
- Jailbirds New Orleans - Netflix Series
- Midnight Mass - Netflix Series
- Friendzone - Netflix Film
- No One Gets Out Alive - Netflix Film
- Polly Pocket: Season 3, Part 1
- Sounds Like Love - Netflix Film
- Love 101: Season 2 - Netflix Series
- Luna Park - Netflix Series
- The Phantom

SUDOKU # 5966

TELANGZUBA # 5965

	8		3	5	2			4	7	8	9	2	6	3	1	5
	1		9			8		1	3	2	4	5	8	6	7	9
	7	4			1			6	5	9	1	3	7	8	2	4
7	4			1	3	2		7	6	1	5	8	3	4	9	2
9				2	8		4	9	4	3	6	1	2	5	8	7
	6					5	9	8	2	5	7	4	9	1	6	3
4	2					7	1	2	9	4	3	6	1	7	5	8
3			5	2	7		6	5	8	6	2	7	4	9	3	1
8			1					3	1	7	8	9	5	2	4	6

OJANG LUTEP # 5511

GUANBA :

AKAJ :

IPE :

NDAING :

NÜAKÜM :

KDAINYANG :

EMKÜL :

BURNÜ :

OKSTAKA :

RURAJU :

OJANG LUTEP TELANGZÜBA # 5510

KANGA ZÜPAZÜLEMBE AJANGA LOKTI TENZÜKBA NUNG TAMAKOK AIBEN ALUTSUSA AKÜMER

TAN HOPTA ATEMA - KOMA SÜLA ?

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümtsü state government-i agizük nunga koma süla ?



September 2, 2021 nü Patiala nung aliba Government Rajindra hospital aser Mata Kaushalya hospital na nungi nurse temi Punjab sorkar nem takhangba balala agüja longkak aitba noksa nung angur.

Afghanistan nung sorkar koma akümtsüar India-i memetet: MEA

New Delhi, September 02 (Agencies): Brihostibarnü India-i, Taliban leniba nung Afghanistan linük nung sorkar komaka akümtsüar India-i memetet, ta metetdaksü.

Osangbenertem senden nung jembidang ministry of external affairs (MEA) otongdar, Arindam Bagchi-i, "Afghanistan nung sorkar komaka akümtsüar onoki osang tejangja memetet. Onoki (Taliban) senden amenba dak sendakba osang ni magütsüsü," ta metetdaksü.

Mongolbarnü India-i tang

mezüng Taliban den tongtepratepa senden menogo. Doha nung aliba Indian mission nung Indian ambassador to Qatar, Deepak Mittal-i Taliban political officer, Sher Mohammad Abbas Stanekzai ajurua senden amen.

India aser Taliban lenir na senden amendang Afghanistan nung India nung, talisa minority tem timtem kecha majurui linük nungi aotsü atema o lemtep. India keddangser Mittal-isa Taliban dang, Afghan nung liji India nung kiralongratsü atema

mamshitsüla, ta ashi.

Taliban den senden amenba dak sendakba nung Bagchi-i, "Iba ya hau mesüra ma ta asüba onük ka masü. Asenok nükjiongji- Afghanistan nung liji kiralongra atema mamshitsüla," ta ashi.

Bagchi-isa, India nung atema tongtibangtibaji Afghanistan yimtiba, Kabul nung aliba India nung timtem majurutsü atema lir; tang Kabul nungi tayimtsü mesenzüur, anungji tayimtsü senzü tenzükba sülen India nung maneni anir arutsü, ta metetdaksü.

India nung ano nisung 47,092 dak Covid putet aser 509 asü

New Delhi, September 02 (Agencies): India nung ano nisung 47,092 dak coronavirus putet, aser ibaji tesüiba ita ana tsüingda anogo ka kija nung nisung timtiba dak iba tashidak putetba lir, ta Brihostibarnü Union Health Ministry-i metetdaksü.

Tang tashi nung India nung nisung ajak senteper 32,857,937 dak coronavirus putetogo aser tesüiba ghonda 24 tsüingda linük nung iba tashidak agi nisung 509 asüba sülen iba tashidak agi asür ajak senteperbo 4,39,529 jungogo, ta Brihostibarnep 9:00 ako nung Union Health Ministry-isa metetdaksü.

Tang India nung coronavirus


agi teshirangdakpur lakh 3.89 lir aser ibaji coronavirus caseload nungi shilem 1.19 lir.

Tesüiba ghonda 24 tsüingda iba tashidak agi shiranger 35,181 anepogo aser tang tashi nung nisung ajak senteper 3,20,28,82 anepogo.

Tang hopta shia coronavirus positive putetba shilem 2.62 lir aser anogo shia positive putetba shilem 2.80 kümogo, ta Health Ministry-i metetdaksü.

Tang tashi nung samples crore 52.48 tendangogo, ta ICMR-i metetdaksü.

Tesüiba ghonda 24 tsüingda coronavirus vaccine dose lakh 81 agütsüogo aser tang tashi nung dose ajak senteper crore 66.30 agütsüogo.



September 02, 2021 nü Union Defence Minister, Rajnath Singh-i Kevadia nung Sardar Vallabhbhai Patel kürakyanglu semdangba mapang tangokba noksa nung angur. Kasa noksa nungsa Gujarat Chief Minister, Vijay Rupani, Union Minister Bhupendra Yadav aser tangartema angur.

Prashant Kishor Congress nung aniochtsü atema Sonia-i telemtetba agitsü

New Delhi, September 02 (Agencies): Election atema asalentong yanglur mongin, Prashant Kishor Congress party nung aniochtsü onük nung party lenirtem tebilemba balala lir, ajisüaka Congress Tir, Sonia Gandhi-i dang tatembangbuba telemtetba agitsü.

Tawa Kishor-i Trinamool Congress den inyaksema liasü aser taküm West Bengal assembly elections nung Trinamool Congress-i takok tulu angubaji pa ajanga lir.

Kishor-i party nung shilem tulu aginer aser election dak sendakba onük nung tongtibang telemtetbatem pai aginer, ajisüaka party lenir aikati candidate tem shimtsü onük nung nisung ka kija nem tashu tulu magütsüner.

Election ana nung tamakok anguba sülen Congress-i

advisors bushidar. Tawa Congress lenir Ahmed Patel anenba ajanga party atema asalentoong yanglur mongin ka akoksaogo.

Tawa Kishor-i Congress lenir, Rahul Gandhi aiben ajuruogo aser item senden nung sangküm Uttar Pradesh densema state pongu nung assembly elections agitsü lia Congress party asentenshitsü atema o lemtepo.

Rahul-ia Kishor party nung aniochtsü atema Congress lenirtem den o lemtepa aruogo, ta senden nung adener party lenirtemi metetdaksü.

Kishor-isa general secretary Priyanka Gandhi aser Congress Tir Sonia Gandhi na ajurua senden menogo. Kobi melii pai Congress party nung adentsüa akok aser pa election incharge general secretary shimtsüa

akok, ta osang angazüker.

Kishor Congress nung aniochtsü atema party lenirtem shingai mashishir, ajisüaka pa kija nem tashi tulu magütsüsüla, kechiyong pa dak melung ajak toka alemtsüsabo masü, ta party lenir kari ashishir.

July 13, 2021 nü pai Rahul Gandhi ajurua sentong kar benoka liasü, iba sülen pa dak sendakba nung senden aiben menogo.

Sangküm Uttar Pradesh, Uttarakhand, Punjab, Goa aser northeast state kar nung assembly election agitsü lia Congress-i party asentenshitsü meranger.

Tamalen Kishor-i Trinamool Congress, DMK aser YSRCP party tem atema election asalentong yangluja liasü aser yamaji party temi takok angu.

J&K nung Seperatist lenir, Syed Ali Shah Geelani süogo

New Delhi/Srinagar, September 02 (Agencies): Separatist lenir, Syed Ali Shah Geelani mapang talangka shiranga aruba sülen Bodhbar aonung Srinagar nung lia alima nungi pilaogo; pa arrshi küm 92 liasü, ta Brihostibarnü osang ka ajanga metetdaksü.

Geelani ya nokdanga aliba yimtenren telok Jamaat-e-Islami nung züingsem liasü aser taoba mapang Hurriyat Conference nung Chairman inyaka liasü.

Paisa pa indang party-Tehreek-e-Hurriyat tenteta liasü.

Geelani ya tesüiba küm 20 tashi temang nung timtem balala ajanga shiranga aruogo.

Pa 1929 küm aso aser 1972, 1977 aser 1987 kümtem nung pa North Kashmir kübok Sopore constituency nungi MLA inyaka aruogo.

Geelani-i jabaso ana aser jala trok toktsür asü. Pa mezüng

kinüngtsü 1968 küm asüba sülen pai tanaben kibong kuma liasü.

Pa küm 20 dak tema tezüingjang tashidak agi shirangba den külemi dementia densema temang nung timtem aika liasü.

Par kinünger kati ashiba agi, Geelani Bodhbar aonung 10:30 ako nung asü. Pa asüba sülen olulu prokba nokdangtsü atema Kashmir nung mobile internet shibangja liasü.

Hurriyat Conference tenzükter rongnung pa densema lir, saka pai iba telok toktsür 2000 küm pa indang party Tehreek-e-Hurriyat tenteta liasü aser kasa küm June ita nung pai Hurriyat Conference toktsü.

Pa asüba sülen Pakistani Ato kilonser, Imran Khan, taoba mapang Jammu & Kashmir chief minister Mehbooba Mufti aser People's Conference (PC) Chairman Sajad Lone nung densema lenirtem aikati mangyim jashi lemsatepo.



New Delhi nung schooltem tanaben lapokba sülen kaketshirtem class nung adenba noksa nung angur. September 1, 2021 nungi Delhi nung class sasep nung shilem lemsar school lapoktsü temelaba agütsü.



Incheon International Airport in Incheon, South Korea nung South Korea dangi China Ambassador Xing Haiming-i (tachichi) China nunger sepai tasumang inoka aliba süngden agizükba noksa nung angur. 1950-53 Korea war nung asüba China nunger sepai 109 indang tanüngzük khen atema yanglua aliba leper nungi kidangi teti atema benerogo.

New York metsüngba sülen emergency benokogo

New York, Rongjui/September 2 (Agencies): Ida yipur agi northeast United States kanga mejungi kongshir aliba mapang Brehostibarnü New Yorker nung tzünglu kanga sashia aruba den tzümetüsü agi kongshia liasü. Iba ajanga tatimtsü aika thitsüogo aser state of emergency dena benokogo. Ida yipru yagi hopta tatem Louisiana state dak kongshi aser iba ajanga tzümet süng adokdaksüba den tornado yipru ajanga teraksatsüba tulu adokdaksüogo. New York governor Kathy Hochul-i state of emergency benokogo, kechiyong yipru ajanga linük financial aser cultural capital kanga mejungi metsüngogo aser Brooklyn aser Queens tesem kanga mejungi kongshir lir. LaGuardia aser JFK airports

asew Newark nunga tayimtsü noklang aika thitsüogo, kong terminal tem tzünglutsü agi metsünger aliba video ajanga sayuogo. Yimti yim tongtem ajak ayong ama aküm aser yimti nung subway station tem tzüng agi metsünga laisü. Metropolitan Transportation Authority-i inyakyim ajak shibanga ataba metetdaksüogo. Footage tem ajanga yimti nung garitem tzü agi metsünger aliba sayuba mapang ka nung ketdangsürtemi tzü agi metsünger gari manshitsu asoshi nüburtem dang mepeshia metetdaksüogo. NWS-i Central Park nung ghonda ka tsünga tzünglur 3.15 inches (80 millimeters) aruba mangaoka lir. Yimti ketdangsürtemi tzümet süng

arutsü ana nung aliba tekümdangtsü metetdaksüogo aser yimti nung alirtem dang tenemleni tekümsükba bushi aotsü metetdaksür liasü. Kasa mapang nung kidanger state New Jersey nunga State governor Phil Murphy-i state of emergency benokogo, kong Passaic yimti nung nisung ka asüba CNN sangdong ka ajanga metetdaksüogo. Tang tashi nung Ida yipru lendong nung nisung ti süogo. US yimtiba nungi mile 30 pilar aliba Annapolis yimti nunga tornado kati süngtong aser electricity poles tem raksaja liasü. US tir Joe Biden-i Hokolbarnü Louisiana semdangtsü, kong Ida yipru agi ki aika raksatsüogo aser ki million aika nung power mongui lir.

Pakistan-i Kashmiri separatist lenir Geelani mang ayim

Islamabad, Rongjui/September 2 (Agencies): Pakistan nung Brehostibarnü Kashmiri separatist lenir Syed Ali Shah Geelani asüba atema anogo ka mangyima mungogo. Arishi küm 91 tain Geelani ya Bodhbar aonung Srinagar nung par kidang asü. Pa mapang talangka temang mejungi liasü. Pro-Pakistan separatist lenir, shiba lenisüba nung Jammu and Kashmir nung küm semer dak tema separatist politics inyaksangshia liasü, pa par ki

anasa mosque ka nung arem. Pakistan Ato Kilonser Imran Khan-i, Geelani asüba osang angazükba pa kanga temulung koremba lemsatepogo. "Pakistan wako half-mast nung yimzudaksütsü aser anogo ka mang ayimtsü," ta Khan-i ashi. Tir Arif Alvi, shibai Geelani nem taoba küm Pakistan indang civilian award tematiba 'Nishan-e-Pakistan' agüja liasü, paia Geelani asüba osang angazüka mang ayimba

lemstepogo. Foreign minister Shah Mahmood Qureshi, Information Minister Fawad Chaudhry aser minister of state for information Farrukh Habib nungeria Geelani asüba osang angazüka mang ayimba osang lemsatepogo. Foreign office otongdar Asim Iftikhar Ahmad-i Twitter ajanga, "linüki ochi aser nüjiso asoshi taküm tepeyong tenzükba atema Geelani nem akhüm tetushi agütsür", ta tweet süa liasü.



India Navy Ship Savitri nung Mobile Oxygen Plant ana bener Bangladesh nung Chattogram rongnendak tonga aoba sülen tangokba noksa nung angur.

North Korea-i Covid-19 vaccine million 3 shi magizük

Seoul, Rongjui/September 2 (Agencies): North Korea-i China nung yangluba coronavirus vaccine; Sinovac vaccine dose million asemshi magizük, ta Unicef-i metetdaksüba news agencies kar nungbo tashidak kanga kara menatepyonga odar, ta ashiba Unicef-i metetdaksü koba AFP-i sangdonga liasü. osang mali aser parnoki vaccine ya tashidak agi kanga mejungi kongshi aliba linüktem nem agütsüsüla ta ashir, ta COVAX scheme kübok sensaker linük nem Covid-19 vaccines agütsüba achayangba UN agency-i ashi. China nungi coronavirus tashidak prokshia aoba nokdangtsü atema North Korea-i taoba küm January ita linük ajunga mokdanga ayu. Iba linük nung Covid-19 tashidak potetba osang ka danga mali saka World Health Organization (WHO-i iba osang dak temulung meleme bilemer. North Korea indang public health ministry-i, Covax-i DPR Korea nem Sinovac doses

million 2.97 agütsüba ya tashidak agi kanga mejungi kongshir aliba linüktem nem agütsütettsü, kechiyong alima nung Covid-19 vaccines supply tatakzük ka dang lir aser linük kar nungbo tashidak kanga kara menatepyonga odar, ta ashiba Unicef-i metetdaksü koba AFP-i sangdonga liasü. Public health ministry-i taruba itatem nung vaccine agizüksü atema COVAX facility den tongtepratepa alitsü, ta Unicef otongdar kati ashi. July ita South Korea nunger ketdangsürtemi ashiba agi, Pyongyang-i AstraZeneca indang Covid-19 vaccine agütsüba magizük, kechiyong iba vaccine agiba ajanga mepetmesü adokba indang osang prokshia liasü. South Korea indang spy agency den sendaktepa aliba Institute for National Security Strategy (INSS)-i ashiba agi, Pyongyang-i China nung yangluba vaccine agitsü atemaa tejangraba balaka mali.



Mainz, Germany kübok Bundesbank nung euro banknote kongdaksütsü yua aliba noksa nung angur. Germany central bank-i ashiba agi, July ita tzümet süng nung euro million 50 dak tema menena liasü. Bundesbank sangdong ka ajanga ashiba agi, tzümet süng nung metenba note tem bank aser nüburtemi parnok nem agütsüdar.

Onoki maneni raratsü: Panjshir resistance force

Kabul, Rongjui/September 2 (Agencies): Afghanistan kübok northeastern province Panjshir nung amenoka aliba Taliban anemertemi, telok ana tsüngda sensaksem tamakok anguba sülen parnoki maneni Taliba anema raratsü ta ashiba news agency ANI sangdong ka ajanga metetdaksü. Taliban-i linük ajunga amokbangogo, saka Panjshir kija magiteti lir. Bodhbarnü resistance force den sensak asemba Taliban lenirtemi ashiba agi, yimden yimsüsüba tsütsü ken o bentettsü atema telok ana tsüngda sensak asemba tamakok nung tembangogo, ta ashi. Bodhbarnü audio osang ka ajanga guidance & encouragement atema Taliban indang commission tekolakba Amir Khan Motaqi-i, Panjshir

residents dang Islamic Emirate den longjemtsü mepeshia metetdaksüogo aser Afghanistan ya Afghan nunger ajak atema ki kümdaksütsü nangzüka liasü. "Onoki rara nungi jenboa liner aser yimden yimsüsüba tsütsü telemtetba ka aginer," ta Motaqi-i ashi. Panjshir valley ya Hindu Kush tementsüng nung lir, koba linük yimtiba Kabul nungi mile 90 shi pilar lir. Ita tsüngda linük ajak atsüngba sülen Taliba-i iba tesem matsüngteti lir. Panjshir nung Taliba anemertem ya Afghan nunger nüngtugu commander Ahmad Shah Massoud'er jabaso Ahmad Massoud aser Amrullah Saleh lenisüba nung inyaksangshir. Tang parnok ajak Panjshir valley nung lir aser Taliban anema nokdaksü merangdangdar.

Dept. of Science & Technology-i Suptd. Tongcheo den tepila sentong agi



Kohima, Rongjui/September 02, 2021: Directorate of Science & Technology indang Conference Hall nung Dept. of Science & Technology-i Office Superintendent, Tongcheo den tepila sentong agi sulen telok külemi tangokba noksa ka yangi angur.

Kohima, Rongjui/ September 02, 2021 (TYO): Mongolbarnü (31.08.2021) Directorate of Science & Technology indang Conference Hall nung, mapa nungi anener, Office Superintendent, Tongcheo Ngully den Department-i tepila sentong agia liasü, ta sangdong ajanga metetdaksü.

Iba sentong nung, Department tenüing nungi Director, Wonchio Odyuo-i jembia liasü. Department asoshi timtem ajak arema aser bendanga agüja inyakba atema, Odyuo-i mapa nungi anensang ketdangsür, Ngully dang pelaba lemsatep; aser iba alizüing takok ngua tongtetba asoshi pa nem tenüingsang agütsü.

Iba sülen, Senior Technical officer, Telaknaro; Science Officer, Richard Rikhio; Under Secretary, Libanthung Patton; Scientist 'D', Dr. Nesatalu Hiese aser Astd. Superintendent Sukhato nungeri jembio. Iba sentong nung Senior Scientific Officer, Er. Kevitso Kenneth menden liasü.

Department of Health & Family Welfare Mokokchung ajanga metetdaksür

Mokokchung, Rongjui/ September 02, 2021 (TYO): Mokokchung District kübok school tesayürtem aser (Stafftem) tanüingba school nung inyakertem (Government aser private) asoshi alakteta Covid 19 vaccination drive ka September 4th anogo nung akatsü, ta Department of Health & Family Welfare Mokokchung sangdong ajanga metetdaksü.

Teküboklen agüja aliba Covid Vaccination Centre nung

anepdang 10:00 ako nungi nikongdang 2:00 ako tashi nung covid 19 ajem agütsütsü.

1. District Hospital
2. Urban Primary Health Center, Yimyu
3. CHC Mangkolemba/ CHC Tuli/ CHC Changtongya
4. PHC Tsurangkong/ PHC Longchem/ PHC Lakhuni /PHC Alongkima/ PHC Sabangya/ PHC Mangmetong/ PHC Longkhum/ PHC Ungma/ PHC Longsa/ PHC Longjang/ PHC Mongsenyimti/ PHC

Chuchuyimlang/ PHC Merangkong/ PHC Kangsung Maneni District Hospital nung temelenshiba kar yamai metetdaksür:

Nüburtem asoshi Covid vaccine Hombar (Monday), Bodhbar (Wednesday) aser Brihostibar (Thursday) agütsütsü Mongolbar(Tuesday) aser Hokolbar (Friday) anogotem nung Routine Immunization aki ama agütsütsü, ta kasa sangdong nung shia lir.

Noklak nung District Level Workshop agi

Noklak, Rongjui/September 02, 2021 (TYO): SDGs tejakleni bener aotsü nükjidong nung, Brehostibarnü (02.09.2021) DC conference hall, Noklak nung District level workshop agia liasü, ta sangdong ajanga metetdaksü.

Iba workshop nung District Planning Officer, Meren Jamir menden liasü aser tanga tongtibang nübu rongnung Deputy Commissioner, Hiazu Meru aser SP Pritpal Kaur den district level department ketdangsür ajak iba workshop nung denogo.

Deputy Commissioner-i okila jembiba mapang SDGs indang metetpeladaksü aser district level nung data bendentsü indang tongtibangtem nung ajemdaker jembia liasü.

Nagaland nung district tasen ka ama, terenlok maparen takok ngua inyaksü asoshi SDGs ya kanga tongtibang, ta pai ashi.

Iba dak sendakba nung

District atema tongtibang tesemtem pai lemsatep, kong lenmang (road connectivity), IT quality healthcare aser education dena lir.

Noklak district nung SDG mapatong takok ngua achaayangtsü nung rangloker, SDGs Officer, SDG coordination Centre, planning & coordination Department, MS Abilo Humtsoe-i power presentation ka agütsü.

SDGs asadanghsitsü atema District indicator Frame maparen aser SDG mapa küma inyaksü atema state aser district level nung asalentong tem indang lai telok den lemsatep.

Iba den külemi, district level nung SDGs indang maparen inyaksangshiba mittsü mechi Noklak district atema data bendenba inyakyim balaka alitsü indang tongtibangtem lai metetdakja liasü.

Kasa sentong nung telok tsüingda sensaksema aka, koba

SDGs Consultant, SDG coordination centre, planning & coordination Department, Zitin Munshi-i iba session ketdangsüa agi. Iba session nung, Noklak District atema tongtibang tesemtem jangjatetsü asoshi jembishinüogo.

Iba workshop tembangba Deputy Commissioner-i tepela anküp o jembia aser iba mapang pai, district atema SDGs ya kanga tongtibang ta telok dang metetdaksü.

Office of the MONGSENYIMTI SENSO MUNG DANG

B.P.O. MONGSENYIMTI P.O. CHUCHUYIMLANG MOKOKCHUNG ; NAGALAND - 798614

TAKOTET KHONANG PELA YIMYIM

Mongsenyimti senso rongnungi tatinemti mongin tsüingteper Sp. Arsenba Ozüküm (Wb. Imtiolem & Wt. Walusangla jabaso) ajanga asen linük tenüing nung GAMMA Asian MMA Championship 2021 asayamung Kyrgyzstan nung ayonga asayaba mapang shilem tajung agia takotet tsüingteper aika akozüka kokteter Bronze Dogma (Bronze Medal) ajangzüketa India rangben, asen Kin aser tongtipangsa Mongsenyimti sanger nem khonang tulu bentsür aruba atema tzuratema pelaba Mongsenyimti Senso Mungdang Mendendi ajanga sangdonger.

Tarutsü anogotem nung Tsüingrem akümtsübu pei nem agütsüba sempet tajungtiba nung amshiteta asen linük aser nübur nem konang tajungtiba ajangzüksütsü sensosanger ajaki yimlaseta sarasadema atar.

Sd/- (IMOTONG) President, MSM

Sd/- (OBANGONEN) Secretary, MSM

SANGDONGER

Wb. L. Bendangtoshi, S/o. Lt. Lanutuba (Wameken) dang nungi kari danga pa nem kinunger aser senmanger-i memeteti aser kuli tejangja makai sen apuja mesüra pa dang kimong-lushi alitsü asoshi inyaksangshi dir, ibaji Pa/La kija khuret asütsü ta nübor ajak dang akang-akanga metetdaksür.

Senmanger, Adianu aser Kinungertem ajak tenüing nung ; 1) Wb. Wapongtemsu 2) Wb. L. Lepzuk

Horticulture Department-i Joint Director Pienyu den tepila sentong agiogo



Kohima, Rongjui/September 02, 2021: Mongolbarnü, Directorate of Horticulture, Kohima indang Conference Hall nung Joint Director, Mesetuoouo Pienyu den tepila sentong agiba mapang tangokba noksa nung angur.

Kohima, Rongjui/September 02, 2021 (TYO): Department of Horticulture nung Joint Director, Mesetuoouo Pienyu, shibai küm 35 tashi tenzüka wadang nung inyaker sülen mapa nungi anena liasü, la nem akhüm agüja Department of Horticulture-i la den tepila sentong ka ayonga agiogo. Mongolbarnü (31.08.2021) Directorate of Horticulture, Kohima indang Conference Hall nung iba sentong agia liasü, ta sangdong ajanga metetdaksü.

Iba sentong nung Commissioner & Secretary, Horticulture, Anenla T. Sato, IAS; Director, Horticulture, Dr. R. Elithung Lotha, technical

staff, establishment staff aser temolunger balalai jembio.

Mapa nungi anener ketdangsür, Pienyu-ia, aluyimertem ajangzüksü asoshi Department nung ketdangsür aser staff ajak dang maneni meranga inyaksü asoshi mepishia liasü.

Iba sentong tembanga, Joint Director, N. Jerry Patton-i tepela anküp o jembia aser sentong nung Additional Director, Qhutovi Wotsa menden liasü. Iba sentong nung Department indang ketdangsür aser staff ajak den Pienyu'er kibong züingsemtem aruagi denogo, ta kasa sangdong nung shia lir.



Phek jila nung September 1 nü single use plastic mamshitsü aser mayoktsü atema tenangzüktepba agiba sentong agiba mapang tangokba noksa nung angur.

International goal timba idaktsür rongnung CR7 kumogo



Lisbon, Rongjui/September 02, 2021 (Agencies): Bodhbarnü World Cup qualifying asayamung nung, otsüsüsüsa Cristiano Ronaldo-i alizüing tasen ka tongtetogo. Portugal aser Ireland na tsüingda World Cup qualifying round asayaba mapang, Ronaldo-i penalty ka metsüpet, saka tebur international football asayamung putiotsü nung goal timtiba idaktsür asayar rongnung pa kumogo.

Iba asaya nung, Ronaldo-i goal tanabuba meinoktsüdang, mezüing goal idaktsüba sülen pai International goal timtiba record yanglua liasü. Ronaldo indang goal ana ajanga Portugal-i Ireland madak goal 2-1 agi takok angu.

Taoba mapang Iran nungner striker Ali Daei (109) indang

international goal record ajangettsü asoshi, telok ana tsüingda asaya atemtsü lia, minute 89buba nung Ronaldo-i goal 110buba idaktsü.

Ireland nungi defender John Egan-i minute 45buba nung mezüing goal idaktsüba sülen goal 1-0 agi Portugal tejakdang ser asaya liasü, saka asaya atemtsü minute trok lia Ireland pur aoksatsüsa, Ronaldo-i goal tanabuba (goal 111) idaktsü. Asaya 180 nung Ronaldo-i iba alizüing tongteter asüsü.

"Ni otsü tasen ka yangluba atema dang masü, saka asenek ajak iba tepela nung benjongteptsü mapang agi sempettsüba asoshi pelar. Asaya tatemlen goal ana tashi idaktsüsü ya tasak, saka tanü külem team puri meranga nokdakba asoshi parnok danga

pelar. Takok angutsü teimla nung tatem tonga onoki longjemer asayaago," ta Ronaldo-i ashi.

Ajisüaka, Ronaldo, shibai Manchester United nung denogo, international soccer (tetsür-tebur) nung pa ano goal 76 agi Canada tsür Christine tesülen lir. Arishi kum 38 tain Christine Sinclair-i taoba ita Tokyo Olympics nung Canada atema goal 187buba idaktsü.

Portugal aser Ireland na World Cup qualifying round asaya tenzüker sülen, Ronaldo-i bilemba ama junga masayateti liasü.

Minute 15buba nung Portugal team-i penalty ka metsüsü maangka angu aser Ronaldo-i iba penalty metsüloktsü, saka Ireland goalkeeper Gavin Bazunu-i iba goal nokdangtet.

2004 European Championship asayamung nung winger ka ama Ronaldo-i Portugal atema mezüing goal idaktsüba mapang, Gavin arishi kum 2 liasü.

2016 Euro asayamung nung Portugal nungi Ronaldo asayaba mapang title koka lir. Taküm European Championship asayamung nung goal timtiba idaktsür rongnung Ronaldo liasü, ajisüaka round of 16 nung par telok tsükadok.

US Open: Stefanos Tsitsipas tasembuba round-i iogo

New York, Rongjui/September 02, 2021 (Agencies): US Open tebur kija tanabuba round asaya nung, World no. 3 aser arishi kum 23 tain Stefanos Tsitsipas-i aces 27 ngua Adrian Mannarino madak 6-3 6-4 6-7(4) 6-0 agi takok angu. Ajisüaka, tena tasayadak nung Stefanos-i mapang langrara 'toilet break' agiba yong, stadium nung terepranger kanga nemnemtepa liasü.

Arthur Ashe Stadium kübok iba asaya mezüing set nung, Greek nungner Tsitsipas-i pa indang mezüing set point ajak akok aser Mannarino indang 26 win' ajangettsü atema pai winner' 53 zükloktsü; aser France nungner Mannarino-i tie-break nung set tasembuba makokdang pai ano set tanabuba atonga takok angu.

Iba sülen, tasayadak nung bathroom break atema Stefanos 'locker room'-i ao aser idakji minute 7 dak tema kazüba ajanga Mannarino tezüdangadok aser ashishitepa liasü.

Stefanos Tsitsipas, shibai tesübuba round nunga Andy Murray den tasayadak nung minute 7 dak tema break agiba ajanga Andy tezüdangadok liasü, pa tanaben Court telungi aйдang aser pai serve tenzüka mapang tashi tereprangertem kanga nemnemtepa liasü.

Tereprangertem nemnemtepa ola adokba ajanga Stefanos minpronga liasü,



ajisüaka tatebuba round nung Spain nungner asayar tasen Carlos Alvaraz den asayatsü atema pai tanüingba game trokprongla akok.

Iba asaya temer sülen, Tsitsipas-i, tasembuba set temer sülen, kü temang asentzü agi süngadok aser khen anisüingzüktsü kanga dang tongtibang," ta ashi.

"Ni kecha tai meinyak, ajiasüning tereprangertem nemnemtepa ya ni mangateter," ta Tsitsipas-i ashi.

"Tereprangertem ni anema jembiba aser nemnemtepa atema ni parnok maitsür. Ni fans tem sapur. Ajisüaka nisung karibo mangateter," ta pai shisem.

"Asenek teinyaktsüka inyaktsü atema khen khenbo tatsüka anisüingzüktsü," ta pai ashi.

Mannarino-i, Tsitsipas-i kecha tai meinyak ta ni bilemer, saka asayaba mapang break

melatsü asoshi tennis ketdangsürtemi temzüngtem reprangtsüla/shisadangtsüla, ta ashi.

"Iba temzüing (mapang talanglang break agiba) ya tai, kechiyong tasayadak nung mapang langrara break agiba yabo tim obendang ka masü, ajisüaka pai aibelena inyak ama nibo mebilemer kechiyong break agitsü asoshi pa dang melaa lir," ta pai ashi.

Roland-Garros runner-up Tsitsipas-i, match ka nung aces 27 ngua ni taoba asaya (aces 22) indang record ajangettogo ta yimdangi maru, ta ashi.

"Bilemba ama ni serve meyoktet. Ni yokba serve aser ball juka atuba yimya kasa dang liasü. Yamaji asüsü bilema meliasü," ta pai ashi.

Kasa asayamung tetsür kija tanabuba round asaya nung 2017 US Open takok angula, America tsür Sloane Stephens-i külem America tsür Coco Gauff madak takok angu.

Tongtibang tennis asayamung nung Sloane aser Coco na mezüing asaya liasü. Sloane-i 6-4, 6-2 agi Coco tsükdaktsür sülen tasembuba round-i iogo.

"Ni Coco meimer aser ajaki ibaji metetta alitsü ta ni bilemer. La asayar tajung ka lir aser tennis asaya nung lai takok ngua asayaba angudang pelar aser la arishi kum 8 alidang nungi tennis asaya tenzüker," ta Stephens-i ashi.

Australia den cricket asayatsü atema Afghanistan dang melaogo: ACB

Kabul, Rongjui/September 02, 2021 (Agencies): November ita Australia cricket team den Test match ka asayatsü atema Taliban-i Afghanistan team dang melaogo, ta Afghanistan Cricket Board sangdong ka ajanga osang jangjatsüogo.

Iba Test match ya November 27, 2021 nü Hobart nung asayatsü renemdar.

August ita tom ka nung Taliban teloki Afghanistan agiba sülen, iba Test match ya Afghanistan team indang mezüing asaya asüsü. Cricket Australia-ia iba asaya ayongzüktsü asoshi imlaa ataba lemsatepa liasü.

Brehostibarnü, Afghanistan indang under-19 Cricket team Bangladesh-i ogo. Iba Tour nung parnoki international ODIs pungo aser Test match ka asayatsü, ta Afghanistan Cricket Board-isa metetdaksü.

"Iba asaya takok ngua ayongzüktsü asoshi Cricket Australia aser Afghanistan Cricket Board na tsüingda tangatetep nung lir. Iba den külemi UAE kübok ayongzüktsü aliba ICC T20 World Cup nunga Afghanistan team asayatsü," ta sangdong nung shia lir.

"Taküm kum tatemlen Afghanistan team pur marudang, iba asayamung atema CA-i maneni Australia

aser Tasmania sorkar tem den jembishinütsü," ta ACB otongdar ajanga metetdaksü.

Taliban-i, Afghanistan men's national cricket team inyakyim/maparen nung onok tebang mayitsü, koba tesüiba kum linük nung takok ngua aser renloka aoba saisapong rongnung cricket liasü, ajisüaka tetsür cricket sentong atema ano osang tejangja ka mali, ta ashi.

Australia indang osangbener - SBS-i ashiba agi, Islam telok nungi teshimtet nübu kati linük balala den tesendaktep dak sendakba nung Tour tem ayongzüktsü ta ashi, ajisüaka Taliban-i Afghanistan indang cricket asayatem akhümtsübutüsü ta ashi.

"Tarutsü nung, linük ajak den onoki tesendaktep tajung yangluner," ta Taliban cultural commission indang deputy head, Ahmadullah Wasiq-i ashiba olen ka SBS ajanga lemsatep.

"Kodang tesendaktep tajung (Taliban aser tanga linüktem) yangludir, Afghanistan asayatem tanga linük nung asayatettsü aser parnoka Afghanistan-i arua cricket asayatettsü," ta Wasiq-i ashi.

August 14, 2021 nü Taliban teloki Kabul agiba sülen, linük kati danga Taliban ya Afghanistan Sorkar ama agizüka/jangjateta mali.

Tokyo Paralympics: Pramod Bhagat semifinal-i iogo



Tokyo, Rongjui/September 02, 2021 (Agencies): Brehostibarnü Tokyo Paralympics - badminton asayamung Group A tebur kija asaya nung World No.1 Pramod Bhagat-i Ukraine nungner Oleksandr Chyrkov madak takok ngur sülen, pa semifinal-i iogo.

Iba asaya nung Arishi kum 33 tain aser world champion, Pramod-i Chyrkov madak 21-12, 21-9 agi takok ngua pai class SL3 nung last four' tongogo. Iba asaya minute 26 nung tembang.

"Bilemba ama tanü ni junga asaya liasü. Oleksandr Chyrkov ya asayar tajung ka aser iba asaya nung pai junga shilem

agiogo. Semi final tongtetba asoshi pelar," ta Pramod Bhagat-i ashi.

"Iba jenjang (semifinal) nungi tenzüka maparen tasakba akümtsü, kechiyong iba ya knockout stage ka lir. Asaya ka nungdang temolung agüja asayaner aser iba den külemi temeyoktet tarep nunga asayatsü lir, koba tasak asüsü," ta Pramod-i ashi.

Hokolbarnü temeyoktet tarep - class SL3-SU5 tetoktepa nung Bhagat aser külem India tsür Palak Kohli nati Thailand nungner temeyoktet tarep Siripong Teamarrom aser Nipada Saensupa den asayatsü.

BILEMDANGANG

"Jenang tasak süka nungdakba osetjibo ajaki bushir."